



30 JAN, 2023

## THT pertaruh `aura` Korea Selatan

Utusan Malaysia, Malaysia



Page 1 of 2

## THT pertaruh `aura` Korea Selatan

**KUALA TERENGGANU:** Juara berganda Liga Hoki Malaysia (MHL) 2022, Pasukan Hoki Terengganu (THT) mempertaruhkan `aura` Korea Selatan untuk saingan musim ini.

Ianya selepas THT kini dilatih Seo Jongho sebagai pengendali menggantikan Roslan Jamaluddin dan diperkuat tiga tonggak import antaranya bekas penjaring terbanyak MHL, Jang Jonghyun.

Presiden Persatuan Hoki Terengganu, Mohd. Fikri Harun, berkata, selain Jonghyun, turut menyarung jersi THT adalah bintang muda Korea Selatan Yoo Seong Ho, 20, dan Choi Hoil, 22.

Menurut beliau, kehadiran Jongho tidak asing lagi buat THT setelah menjadi pembantu Dharma Raj Abdullah pada 2020 manakala Jonghyun muncul sebagai pemain paling digeruni dalam MHL.



**WAN Sukairi Wan Abdullah (tengah, berdiri) bergambar bersama pasukan THT pada Majlis Pelancaran jersi dan memperkenalkan penaja dan pemain dan pasukan Hoki Wanita di Kuala Terengganu, semalam.**

"Ini adalah cubaan berani THT kerana Jongho akan menampilkan perubahan taktikal yang lebih baik dan beliau juga

tahu kualiti dan tahap permainan pemain-pemain sedia ada. "Manakala Seong Ho dan Hoil pula bakal membarisi skuad

senior Korea Selatan sebaik tamat Piala Dunia selain merupakan antara pakar flik terbaik remaja Asia.

"Sasaran tahun ini adalah mengekalkan kejuaraan Piala Sumbangsih dan liga serta merampas Piala TNB sekaligus muncul juara `treble`," katanya pada majlis memperkenalkan pasukan, semalam.

Mohd. Fikri menjelaskan, turut kekal bersama THT pasangan adik-beradik, Faizal dan Fitri Saari serta pemain negara, Hafizuddin Othman, Mohamad Marhan Jalil dan Muhammad Arif Syafe Ishak.

Sementara itu menurutnya, negeri itu juga kembali diwakili pasukan bagi saingan wanita selepas kali terakhir Pasukan Hoki Wanita Terengganu (TLHT) mengambil bahagian pada 2020.

Namun Mohd. Fikri berkata, tiada sasaran besar diletakkan buat TLHT yang menjadikan aksi liga tahun ini sebagai pendedahan menghadapi Sukan Malaysia (Sukma) 2024.